

VENDIM
Nr. 263, datë 12.4.2012

**PËR PËRCAKTIMIN E RREGULLAVE TË HOLLËSISHME PËR BASHKËPUNIMIN
NDËRMJET MEKANIZMAVE INSTITUCIONALË DHE ORGANIZATAVE
JOFITIMPRURËSE, PËR REALIZIMIN E POLITIKAVE VENDORE PËR MBROJTJEN E TË
DREJTAVE TË FËMIJËVE**

Në mbështetje të nenit 100 të Kushtetutës dhe të pikës 5 të nenit 32 të ligjit nr. 10347, datë 4.11.2010 “Për mbrojtjen e të drejtave të fëmijës”, me propozimin e Ministrit të Punës, Çështjeve Sociale dhe Shanseve të Barabarta, Këshilli i Ministrave

VENDOSI:

1. Për realizimin e politikave vendore për mbrojtjen e të drejtave të fëmijëve, mekanizmat në nivel qendror dhe vendor bashkëpunojnë ngushtësisht me organizatat jofitimprurëse që kanë në objekt të veprimtarisë së tyre të drejtat e fëmijëve.

2. Bashkëpunimi ka në themel parimet e përgjithshme të interesit më të lartë të fëmijës, barazisë dhe mosdiskriminimit për shkak që janë të përcaktuara në ligj.

3. Mekanizmat institucionalë në nivel qendror dhe vendor bashkëpunojnë me organizatat jofitimprurëse, me qëllim realizimin e politikave vendore në:

a) hartimin dhe zbatimin e ligjeve, strategjive kombëtare dhe programeve direkte që kanë në fokus fëmijët dhe nevojat e tyre;

b) zbatimin e strategjive sektoriale e ndërsektoriale dhe programeve të tjera, të cilat nëpërmjet drejtimeve të tyre ndikojnë në jetesën e fëmijëve;

c) ngritjen dhe fuqizimin e njësive për mbrojtjen e fëmijëve/njësive për të drejtat e fëmijëve dhe të strukturave të ngarkuara me çështje sociale, që funksionojnë brenda strukturave administrative të njësive të qeverisjes vendore;

ç) kontributin e përbashkët në grupet multidisiplinore për mbrojtjen, referimin dhe analizën e rasteve të fëmijëve në rrezik;

d) identifikimin e problematikave, pengesave dhe nevojave lidhur me shërbimet (sociale, shëndetësore, arsimore, psikologjike e ligjore) në nivel vendor;

dh) kryerjen e trajnimeve dhe programeve të përbashkëta për kualifikimin e personave përgjegjës për çështjet e fëmijëve, në strukturat e pushtetit vendor;

e) kryerjen e analizave, studimeve dhe vërtetimeve të kryera në nivel qendror dhe vendor për aspekte të ndryshme të jetës së fëmijëve dhe kategorive të tyre;

ë) bashkëpunimin në fushën e mbledhjes së të dhënave statistikore, analizës dhe shkëmbimit të informacionit;

f) organizimin e fushatave të përbashkëta të sensibilizimit për respektimin dhe mbrojtjen e të drejtave të fëmijëve;

g) hartimin dhe zbatimin e projekteve që synojnë përmirësimin e gjendjes së të drejtave të fëmijëve në komunën/bashkinë/qarkun ku ushtron veprimtarinë e saj organizata jofitimprurëse.

4. Mekanizmat për mbrojtjen e të drejtave të fëmijëve, në nivel qendror e vendor, në kuadër të këtij bashkëpunimi, angazhohen:

a) të lehtësojnë procesin e bashkëpunimit të organizatave jofitimprurëse me institucionet shtetërore në nivel vendor;

b) të koordinojnë iniciativat e ndërmarra nga OJF-të me iniciativa të tjera, në kuadër të zbatimit të Strategjisë Kombëtare për Fëmijët ose programeve të tjera;

c) të marrin pjesë në takime të rregullta konsultative, trajnime, konferenca dhe aktivitete të tjera të planifikuara për mbrojtjen e të drejtave të fëmijëve;

ç) të mbështesin, nëpërmjet orientimit të donatorëve vendas dhe ndërkombëtarë, zbatimin në nivel vendor të objektivave të Strategjisë Kombëtare të Fëmijëve;

d) të ndërgjegjësojnë komunitetin, në bashkëpunim me njësitë për mbrojtjen e fëmijëve /njësitë për të drejtat e fëmijëve, strukturat e ngarkuara me çështje sociale në nivel komune/bashkie/qarku dhe autoritete të tjera, duke organizuar takime informuese, edukuese dhe trajnuese për mbrojtjen e fëmijës në territorin e bashkisë/komunës/qarkut;

dh) të mbështesin rastet konkrete të fëmijëve në rrezik, të paraqitura nga organizatat jofitimprurëse, pas identifikimit të nevojave për shërbime konkrete ligjore, psiko-sociale, akomodim pranë institucioneve rezidenciale, strehëzave për viktimat e dhunës në familje, qendrave ditore, në varësi të rastit, etj.

5. Organizatat jofitimprurëse, sipas legjislacionit në fuqi, angazhohen:

a) të mbështesin njësitë për mbrojtjen e fëmijëve/njësitë për të drejtat e fëmijëve dhe strukturat e ngarkuara me çështje sociale, në nivel komune/bashkie/qarku, në iniciativat e përbashkëta për zbatimin e programeve e projekteve konkrete, të ndërmarra në mbrojtje të të drejtave të fëmijëve e veçanërisht për mbështetjen e grupeve në rrezik të përjashtimit social, si: fëmijët nga familjet e varfra; fëmijët që punojnë në rrugë; fëmijët e trafikuar me qëllime shfrytëzimi brenda dhe jashtë vendit (përfshirë shfrytëzimin seksual); fëmijët me aftësi të kufizuara; fëmijët që vuajnë nga dhuna në familje etj.;

b) të ndajnë me institucionet shtetërore në nivel vendor praktikat më të mira në drejtim të krijimit të mekanizmave të mbrojtjes së fëmijëve;

c) të marrin pjesë aktivisht në diskutimet dhe konsultimet për standardet, politikat, legjislacionin që lidhet me mbrojtjen e fëmijëve në shërbimet sociale, shëndetësore, ligjore, arsim dhe shërbime të tjera;

ç) të kontribuojnë në vlerësimet për nevojat sociale të komuniteteve rurale, periurbane e urbane, duke përfshirë ekspertë dhe duke lehtësuar procesin e vlerësimit përmes vrojtimeve, grupeve të fokusuara apo intervistave;

d) të ndihmojnë në ngritjen e shërbimeve komunitare alternative për grupet në nevojë, si dhe në angazhimin e komuniteteve në procesin e vlerësimit të nevojave, planifikimit dhe zbatimit;

dh) të marrin pjesë aktivisht në grupet multidisiplinore të ngritura në kuadër të mekanizmit të bashkërendimit të punës për referimin e rasteve të fëmijëve në rrezik;

e) të ndihmojnë në ngritjen e kapaciteteve të ofruesve të shërbimeve në nivel qendror dhe vendor;

ë) të informojnë në mënyrë periodike Agjencinë Shtetërore për Mbrojtjen e të Drejtave të Fëmijës me të dhëna apo me çdo lloj informacioni tjetër për gjendjen e respektimit dhe mbrojtjes së të drejtave të fëmijëve dhe kontributin e tyre në këtë të fundit;

f) të hartojnë kode të sjelljes dhe rregullore për procedurat për mbrojtjen e fëmijëve, me qëllim ushtrimin me efektivitet të veprimitarisë së tyre.

6. Institucionet qendrore dhe vendore në nivel lokal hartojnë dhe zbatojnë marrëveshje bashkëpunimi me organizatat jofitimprurëse në fushën e:

a) ofrimit dhe forcimit të shërbimeve ekzistuese (sociale, shëndetësore, arsimore, juridike);

b) planifikimit dhe ofrimit të shërbimeve të reja;

c) mbështetjes për ngritjen dhe fuqizimin e kapaciteteve të njësive për mbrojtjen e fëmijëve dhe njësive për të drejtat e fëmijëve, në nivel komune/bashkie/qarku;

ç) hartimit dhe zbatimit të projekteve, studimeve dhe protokollove të përbashkëta;

d) ofrimit të trajnimeve të përbashkëta për çështje që lidhen me mbrojtjen dhe respektimin e të drejtave të fëmijëve.

7. Ngarkohet Ministri i Punës, Çështjeve Sociale dhe Shanseve të Barabarta për mbikëqytjen e zbatimit të këtij vendimi.

Ky vendim hyn në fuqi pas botimit në Fletoren Zyrtare.

KRYEMINISTRI

Sali Berisha